

Buat ida husi hirak ne'ebé ha'u hadomi kona-ba Timor-Leste – aleinde ninia foho no tasi furak sira – maka maneira Timoroan sira valoriza sira-nia independénsia no liberdade. Foin daudaun ne'e, Timoroan sira selebra tinan 18 restaurasaun ba sira-nia independénsia.

Ohin iha loron 4 fulan Jullu, Amerikanu sira selebra tinan 244 ami-nia independénsia. Momentu istóriku hirak ne'e dook ona haree husi tempu no espasu, maibé ita-nia domin ba liberdade no independénsia unifika ita-nia nasaun rua ne'e.

Deklarasaun Estados Unidos Amérika nia Independénsia kria ona “governu mai husi povu, halao husi povu no ba povu.” Ne'e prinsípiu ida ne'ebé importante tebes: katak povu la eziste atu serbi governu, maibé governu kompostu husi povu no eziste atu serbi ninia sidadaun sira.

Ami-nia dokumentus fundadór sira garante ema hotu-hotu nia direitus inerentes no governu nia papel maka proteje direitus hirak ne'e.

Iha semanas hirak ne'e, mundu haree ona oinsá sidadaun sira iha demokrasia livre no abertu halo sira-nia governu responsabiliza no ezije respeito ba direitus sidadaun hotu-hotu nian.

Sosiedade sivil iha Estados Unidos Amérika fó hanoin ona ba ami kona-ba dezafiu sira ne'ebé eziste iha ami-nia sosiedade hodi forma “uniaun perfektu liután” ne'ebé Konstituisaun Estados Unidos Amérika prevé.

Ami sente orgulhu bele iha parseirus iha Timor-Leste ne'ebé fahe ideais hirak ne'e, tan ne'e maka Estados Unidos Amérika sai apoiante no parseiru boot liu ba Timor-Leste nia instituisaun demokrátika sira .

Iha ne'e eziste sosiedade sivil ida ne'ebé vibrante – no ami komprometidu hodi ajuda nia dezenvolve no sai buras liután.

Enkuantu ami selebra Amérika nia Independénsia ohin, ha'u kontente hodi anuncia katak iha tinan lima tuirmai Estados Unidos Amérika, liuhusi USAID, sei investe besik \$10 miliaun ba iha Timor-Leste nia sosiedade sivil no nia abilidade hodi serbi.

Iha ámbitu programa ne'e, ONG Timoroan sira hamutuk 10 sei asesu ba ferramentus hodi ajuda sira defende povu ne'ebé sira serbi no diversifika sira-nia fontes finansiamentu.

Obrigada ba ita-boot sira-nia apoiu ba Estados Unidos Amérika iha momentu ne'ebé ami selebra ami-nia Loron Independénsia, aniversáriu ida ne'ebé kontinua sai fonte ida ba esperansa ba ema sira ne'ebé hadomi liberdade iha mundu tomak.